

# «Nagin junkie na vul daventar in junkie»

ANNA SELINA QUINTER/RTR

■ **E tuttina datti ellas. Er en Svizra, er en il Grischun ed er en la Rumantschia. Persunas dependentas da drogas. L'istorgia da Gian Reto Blumenthal è in exempel, in'istorgia da blers destins a l'ur da la societad. Ina da quellas istorzias e da quels destins ch'i «na dat betg tar nus».** Gian Reto Blumenthal ha 34 onns. El è in dad els. Cannabis, medicaments, cocain, allucinogens, heroin: El ha gia consumà tut quellas substanzas. Gian Reto è dependent. Già dapi ch'el ha 16 onns consumescha el cannabis e dapi ch'el ha 21 onns heroin. Ditg è el stà en la scena da drogas a Winterthur ed er en quella da Cuira.

## Ussa basta

Ma uss èsi avunda. – Gian Reto emprova da chalar, da daventar puspè «clean» e da chattar sia via or da las drogas. El fa perquai ina terapia ed ina dischintoxicaziun. El di: «Quai è la davosa schanza. Jau na less betg far anc ina giada ina dischintoxicaziun cun 40 u 50 onns – uss èsi nairas uras da chalar.» Gian Reto quinta avertamain sia istorgia. El raquinta co ch'el ha vivi sis onns en la dipendenza. El raquinta da sias experientschas, sias regurdientschas e da ses puncts ils pli auts sco er ils pli bass. Ed el raquinta da ses cumbat – in che cuntescha l'entira vita.

## Cun il sustegn da sia famiglia

La famiglia da Gian Reto l'ha adina sustegnì, malgrà ch'el fa gia la 15avla dischintoxicaziun e sia segunda terapia lunga. Enfin uss n'ha Gian Reto anc betg dumagnà da far il pass or da la dipendenza. Per el èsi dentant cler: Sia terapia a Gontenschwil en il chantun Argovia duai esser sia davosa. La mamma Anita e la sora Nadine raquintan or da lur perspectiva, co ch'ellas èn vegnidas a frida cun la



«Quai è la davosa schanza. Uss èsi nairas uras da chalar.»

Gian Reto Blumenthal

situaziun: «Igl ha duvrà in temp fin ch'ins è stà capabel dad acceptar che Gian Reto è dependent da drogas», di la mamma, «ma nus avain adina empruvà da sustegnair el e gidar sin sia via or da la dipendenza.» Durant il temp da sia emprima terapia ha Gian Reto documentà sia vita sin placats. Quels l'han gidà da laschar reviver sia istorgia e da vegnir a frida cun ses sentiments. Cun ils placats è Gian Reto era stà en scolas: Raquintar sia istorgia ed esser in exempel per auters, quai fiss er en il futur in siemi da Gian Reto. Sche sia terapia gartegia, fissi ses giavisch d'avair ina famiglia cun uffants e da lavurar en il sectur social.

## La Svizra – in paradìs per drogas?

«Sugar», «base», «koki», «knall» – plets ch'ins auda savens en la scena da drogas, plets ch'era Gian Reto dovra en ses vocabulari. La scena da drogas è per blers lunsch davent. Ma consum e dipendenza entschaivan pli baud che cocain u he-

roin. Per propi savair chapir tge dimensiuns ch'il consum da drogas en Svizra ha insumma – qua intginas cifras e fats: Tenor l'organisaziun Dipendenza Svizra è cannabis la droga illegala che vegn consumada il pli fitg. S'augmentà ha però ils davos onns era il consum da cocain: Passa 5 tonnas vegnan consumadas en Svizra durant in onn. Tiers vegnan 2,5 tonnas heroin per onn ed er il consum da medicaments illegals, ils benzodiazepins, crescha ad in crescher.

## Ina da las grondas scenas è a Cuira

La scena da drogas a Cuira vala sco ina da las pli grondas scenas da drogas avertas en Svizra. Il «Stadtpark», er enconuscent sco «Stadtpark», è gia daditg in lieu da sentupada per persunas che vivan a l'ur da la societad. I n'è nagin secret ch'i vegn consumà drogas davos ils mirs dal Stadtpark. A quella situaziun emprova la citad da Cuira daditg da dar dumogn. Già dapi passa 20 onns datti perquai a

Cuira in post da distribuziun da heroin ed opiats, l'ambulatori «Neumühle.» Dapi 26 onns datti en il Grischun l'Agid per surviver che porscha sustegn a persunas a l'ur da la societad u a dependentas e dependents, tranter auter cun ina cuschina per persunas senza tetg e cun in alloschi d'urgenza. Dapi l'avrigl da l'onn passà porscha l'Agid da surviver era lavur sin via. In project pilot che cuzza enfin il mars 2021. Il «streetwork» da Cuira è sut la batgetta da Romina Beeli: «Nus sustegnain e cussegliain las persunas ch'èn savens en il spazi public, sch'ellas vulan quai», di ella, «cun la finamira da megliar in zic lur kundiziuns da vita.» La pli gronda sfida è tenor Romina Beeli «da vesair che quel agid è limità, savens era causa ch'i mancan anc purschidas che quellas persunas duvrassan.»

## Per exempel ina stanza da consumaziun

Il mument manca a Cuira anc ina stanza da consumaziun. Ina stanza, nua che persunas dependentas pon consumar lur drogas sut surveglianza da persunas dal fatg, e nua che las drogas pon vegnir testadas avant il consum. La citad da Cuira less dentant schliar quest problem. L'emprim pass sin plaun politic è gia fatg – uss èn dentant anc intginas dumondas avertas: Tgi paja e tgi maina questa instituziun? Plinavant sto er vegnir scleri: Co vai vinavant cun la purschida da «streetwork»? Dar dumogn a la situaziun en la citad da Cuira è in lung process che dura gia blers onns ed er in che vegn anc a fatschentar ils proxims onns.

Quest artigel accompogna l'emissiun «Marella» (accessibla sin [www.rtr.ch](http://www.rtr.ch)) che la redactura Anna Selina Quinter ha realisà sco lavur da diplom a la Scuola da schurnalistas e schurnalists MAZ a Lucerna. Elavuraziun da l'artigel: Flurin Andry/FMR